



**Papa Francestg
ha envidà plis
moviments.**

Papa Francestg envida moviments populars

In giast rapporta e commentescha

DA GUIU SOBIELA-CAANITZ

■ Dapi decennis datti en la Brasilia in «Movimento dos trabalhadores rurais sem terra» (MST), numnà simplamain «Movimento dos sem terra», per defender ils interess dal proletariat rural.

Il MST è collià cun bleras gruppas sumegliantas, per exempel, a Jerusalem e Betlehem, il Center d'infurmaziun alternativa (CIA) per ina pasch gista en Israel e Palestina. Michel Warschawski, naschì 1949 a Strassburg e parsura dal CIA, scriva adina puspè en la gasetta quotidiana «Le Courrier» (Genevra). En il numer dals 7 da november (p. 2) rapporta'l che papa Francestg haja envidà plis moviments, t. a. il MST ed il CIA, ad ina scuntrada al Vatican. Warschawski è l'emprin sa smirveglià, damai che la commembranza da la CIA saja cunzunt giudaica e muslima. Ma l'insistenza dals amis brasilians l'ha persvas d'ir cun els al Vatican. El scriva:

«Il papa leva metter ad ir in dialog intensiv tranter la baselgia catolica e var tschient moviments populars che provognivan da mintga part dal mund. I deva trais temas: Terra, lavur ed abitaziun. Quai era propi captivant (...). I sa

tractava (...) da moviments da basa nua che las classas las pli marginalisadas da la societad e dal mund da la lavur s'organiseschan, per exempel quels che recicleschan il rument da Rio de Janeiro, ubain ils purs da l'Africa centrala dischlocads da las guerras (...) u ils avdants dals quartiers da baraccas en Africa ed en l'America latina ch'en vegnids fugitivs en l'agen pajais pervi da speculaziuns sin immobiglias. Lur è vegnida la sentupada cun papa Francestg e sia allocuziun directa, perfin cordiala ed uschè radicala ch'ins stueva esser stut. El ha descrit implacablamain noss mund nua che l'uman è vegnì il sclav dal chapital (...). Lur ha'l appellà ils moviments populars a vegnir las substanzas activas per ina necessaria vieuta revoluziunara (...). El ha punctuà: 'Terra, lavur ed abitaziun èn dretgs sontgs ed inalienabels da mintga carstgaun.' Munta quai ina vieuta da la baselgia catolica? Quai n'è betg segir: Ins stueva mo mirar las fatschas da tscherts cardinals che tadlavan il discurs dal papa, apparentamain consternads da ses radicalissem. Evident è dentant il cumbat aifer las instanzas superiuras da la baselgia areguard ina vieuta da sia implicaziun sociala e politica.»